

o T 5460/7244.29

CHINESE - JAPANESE LIBRARY OF
HARVARD - YENCHING INSTITUTE

AT HARVARD UNIVERSITY
FEB 18 1941

4

Faint, illegible text visible through the paper, likely bleed-through from the reverse side. The text is arranged in vertical columns within a rectangular border.

屈翁山詩集卷第五

哈佛大學漢和
圖書館珍藏印

鴛水徐肇元掄二選

周源長荆思

校正

徐起元瀛奇

七言律詩

塞上逢李武曾

相逢一醉白登鄉岐路蒼茫恨夕陽塞北離愁隨地潤
江南歸夢繞天長高堂望斷陰山月班馬嘶殘子夜霜
明日黃雲千里隔故人那得共壺觴

望雲州

西望雲州但夕陽漢家何處有金湯三年馬首迷春草

八月龍沙怨早霜夢逐黃河穿塞盡愁隨鴻雁入關長
平生壯志成蕭瑟空復哀歌弔戰場

題鷄鳴驛

馬飲洋河春水肥鷄鳴山驛曉霞飛漢皇宣府餘歌管
遼后花園滿翠微紅草溝邊朝會獵鴛鴦泊上暮開圍
愁來不飲燕姬酒清淚將同露濕衣

春日代州郊外作

青山一路帶滹沱復有垂楊拂玉珂調馬正宜春草軟
望鄉爭奈白雲多美人花裏揚鞭出上客林中射雉過
相與晉王祠畔飲英雄往事一悲歌

送顧寧人

鴈門北接嘗山路爾去登臨勝槩多天上三關橫朔漠
雲中八水會渾河飄零且覓藏書洞慷慨休聽出塞歌
我欲金箱圖五嶽相從先向曲陽過

紫荆關道中送客

紫荆雄據飛狐口河繞長城去渺茫萬里悲風隨出塞
三年明月照忠鄉平生亦抱昭君怨白首猶尋結客場
愁絕春寒紛雨雪送行難得酒盈觴

諸公餞予玉河亭子賦別

御溝一片東西水相送扁舟去五湖天上若無娥月好

人間誰伴客星孤，但同慈母餐芝草。便是仙人隱玉臺，燕市悲歌今已矣。諸君好自作屠沽。

杜曲謁杜子美先生祠

城南韋杜瀟川濱，工部千秋廟貌新。一代悲歌成國史，二南風化在騷人。少陵原上花含日，皇子陂前鳥弄春。稷契平生空自許，誰知詞客有經綸。

越中寄廬山無可大師

久辭慧遠溪邊月，因戀夷光石上花。夢裏時時聞瀑布，曲中日日見朝霞。觀空亦復憐天女，服食無如採月華。五老蒼蒼煙霧隔，知君何處著袈娑。

讀史

蚩尤祭後霸圖雄，一劍能成赤帝功。龍起不曾階尺土，人歸何必在重瞳。天邊星宿朝東井，沛上旌旗捲大風。此日留侯方寂寞，咸陽王氣望無窮。

將度梅關賦贈南雄朱參軍

十載天南此謫居，鴛湖歸興近何如。官衙喜傍紅梅驛，春野堪陪白鹿車。自昔仙人多守令，未應吾道在樵漁。浮家我且臨京口，相待金焦共著書。

與柳子談淮陰侯事賦別李子

只今垂釣亦良圖，漂母能知大丈夫。一飯自應求婦女。

千金誰肯易屠沽相逢歲暮寒衣盡相送淮南濁酒無
雨濕天陰揮手去可憐啼殺白頭烏

送人上華嶽

一石岩巖成一嶽三峰窈窕入三門蓮花半壓仙人掌
瀑布全傾玉女盆雲出金天皆白氣河通玉井是真源
君行好上西玄洞拂我題詩舊墨痕

昭江春望代景子

黃皮袴褶已全收淚灑空山葬紫騮意氣不堪三戰盡
功名難向一人求陰陰桑柘雞聲午渺渺雲山雁影秋
歸去故園高臥好男兒豈必盡封侯

春山雨過翠微新千嶂青青欲染人芳艸漸侵樵路暗
落花初點野田勻將歸海嶠嗟無計已謝疆場幸有身
白髮孀慈知健否三年望斷繡衣臣

代景子將歸寄內之作

何事時來反息機將軍難挽紫騮飛多因戍婦啼紅粉
亦是山人愛白衣士馬自分諸部去簪纓誰惜一人歸
高堂此夕應同汝夢見戎裝脫翠微

送曹郡丞

蕭齋臥病日沉淪知己潯江自少人無路可歸黃木浦
有辭難乞白華身一春風雨飄鄉夢三載關山黯戰塵

樽酒不堪還送別桃花和淚共沾巾

浮湘作

洞庭何處但空天湘口人家沒水烟山色淡分秋雨外
濤聲寒落曉風前蘭堂未得三閭返瑤瑟難從二女傳
終古雲愁兼海思枝枝班竹似嬈娟

和王不蕃幽居之作

一夕秋風老玉顏無人但掩白雲關臥當流水難成夢
行見梅花不欲還禪寂定於征戰後功名應在有無間
葛巾丰度開東漢賴爾林泉一日閒

吳門春日作

春光最愛闔閭城清婉吳音復有情一代風流餘屨響
千秋怨毒是簫聲家家柳拂長天亂處處花含積雪明
市井只今誰烈士橋邊空識伯鸞名
橋西舊有伯鸞居四百飛橋盡不如泉石誰令高士在
鶯花自是美人餘春聲只可聞臯氏簫曲那能到闔廬
吳下繇來多俠烈我行端不爲鱸魚

秣陵感懷

芝華采采未療饑南國飄零事事非烟雨又將春色去
林泉那得白雲歸蕭疎素髮慚金鏡寂寞青溪弔玉衰
貧賤每憂知己厭踟躕人外對斜暉

江風吹雨散陰寒多少鶯花不忍看地有三渠知太液
天留雙闕謂牛首作長安黃羊處處銜桃葉白鷺朝朝傍
竹竿欲住秦淮偏未得高堂千里念游盤

舊京感懷

羽翼秋高未奮飛移家偏向帝王畿文章總爲先朝作
涕淚私從舊山揮燕雀湖空芳艸長胭脂井滿落花肥
城邊亦有陰山在怪得風沙暗翠微陰山在江寧縣西南

內橋東去是長干馬上春人擁薄寒三月風光愁裏度
六朝花柳夢中看江南哀後無詞賦塞北歸來有羽翰
形勢祇餘杯土在鍾山何必更龍蟠

送甘健齋近豫章

嗟君一別釣魚磯江左飄零道欲非有計且須還栗里

無名何必學蒲衣

君不撰無名高士傳

鷹風塞上驚初起蟬露林

間幸未晞令子聲音清老鳳芙蓉九疊拂雲飛

度梅嶺贈閩人

三度攜家此嶺頭閩中秦越各歡愁無多骨肉貧猶別
不盡關山老叟遊玉枕山名頻同新婦夜紅梅已謝故人

謂華姜

秋平生蹤跡希梁孟欲把吳門作首丘

九日與客登潮泉山觀潮泉作有序

山在清溪驛東五里泉從石穴湧出聲如沸

雷泉大者爲雄小者爲雌一雄長則一雌消
日凡三長三消消則涓滴都絕若此地從無
泉水者惟秋冬間泉無消長乃有細水長流
寺僧謂此泉下應海潮然秋冬間海未嘗無
潮而泉顧不應之何耶湛文簡嘗稱爲靈泉
有詩刻石今存

峽口千峰紫翠招維舟且復上烟霄山無日暮含紅雨
泉有雌雄應海潮四座花飛爭上酒中流松臥忽成橋
幽尋正及登高節一路秋光逐画橈

黃龍洞尋南漢天華宮故址

在羅浮

英雄割據未全非此日龍川霸氣微輦路已隨秋草沒
歌塵猶作綵雲飛美人何處還金殿壯士當年盡錦衣
一白諸陵風雨後空留杜宇怨斜暉

留別南雄某別駕

別駕多才盡不如南來初下白門車六朝春色歸辭賦
五嶺梅花繞簿書玩世堪爲濠上吏浮家莫羨武陵漁
時予將往沅湘江南一片萋萋草愁絕王孫失路餘

壽東莞周丈

當年五老園中客文采翩翩號石林此日尋仙從地肺
知君觀易得天心梅花亂點宜春酒桂樹多棲擣藥禽

戶外羅浮峰四百殷勤一日一峰吟

壘深舟中春望作

喬木村村是木棉荔枝林裏出炊烟山痕青入寒天遠
水氣黃含落日鮮一棹暮歸驚宿鷺孤齋春臥畏啼鶻
江山如此無人恨歲歲花開獨愴然

九日舟經清遠峽登高有作

登高何處踏蒼苔繫舸軒轅庶子臺三峽東西千嶂合
二禺南北一江開松楸有淚流霜引猿狖無聲落葉催
典盡寒衣當歲晏蘆花難禦雪花來

登高愁似送將歸不落山空孤夕暉紅葉有霜終日醉

黃花多露一秋肥蕭條返舍餘長劍潦倒于人失布衣
寄語江間漁父好白鷗無食向君飛

自滇陽至穗城江行有作

欲雨空濛翠益深秋光不逐夕陽沉虛無樹影迷烟棹
幽咽猿聲和水琴石壘青螺全作髻峰抽碧玉半成簪
谿訝洞口雲爭吐濕盡衣裘冷不禁

拂窗飛過一峰峰翠黛含烟落幾重崩石影搖三峽棧
濕泉聲亂半天鐘光分明月憐空水色染清霜愛紫茸
更好秋光黃菊似屏風點綴錦雲濃

六月十五夕就樹軒玩月

未秋先已作秋光解爲炎天散早涼花外尚餘銀漢淺
鏡中那有碧空長虛無玉笛風何處滴瀝羅衣露未央
清絕郡齋林壑似庾公留客有胡牀

過梁餘仲池亭賦贈

池開盡養右軍鵝真草朝朝墨幾螺少日悔教團扇貴
暮年知厭練裙多蟬吟未必無心甚龍聽其如有角何
新作園林娛白首梅花一樹最婆娑

龍以角聽君
近輩故云

讀荆軻傳作

置酒華陽曲未終美人奇馬玉盤中何須七首勞神勇
更使將軍作鬼雄一自悲風生易水千秋白日貫長虹

殷勤倘用荆卿將自可威加督亢東

田光鞠武總謀臣計失須臾欲劫秦豈有精靈歸匕首
空令哀怨斷龍唇蕭蕭風起衝冠髮颯颯雲吹首路塵

自此悲歌燕市絕屠沽無復報恩人

斷龍唇謂斬鼓
琴美人手也

讀書擊劍未蹉跎儒雅偏於慷慨多豈有先生非樂毅
何曾太子識荆軻燕風已起離騷賦楚調如追易水歌
壯士至今猶髮指寇讐長枕報秦戈

平生劍術未曾疎况是深沈解好書蓋聶相期知不可
漸離同去意何如六王有恨惟銅柱一擿無成更副車
可惜漢家需佐命英雄未得少踟躕

多事田光苦殉名，匆匆仗劍激荆卿。英雄不肯言成敗，
節俠何知有死生。皆白衣冠持大斗，盡衝毛髮上長纓。
離觴未半驅車去，風葉哀含變徵聲。

雨後代泛亭望湖

雨過湖光飛滿城，一亭含吐盡青冥。浮沉半逐羅浮影，
噴薄全開瀑布屏。白鷺祗同漁父冷，芙蓉多爲使君馨。
荷錢買得鴛鴦否，羨殺雙雙錦繡翎。

明妃廟

明妃祠枕楚江沙，萬壑群山夾道斜。明月尚懸香水鏡，
芙蓉早墮玉門笳。羞同公主隨胡俗，幸似闕氏在漢家。

終古秭歸哀怨地，杜鵑聲裏有琵琶。

紅顏亦可壯中華，詔賜單于出內家。爲漢自應高俎豆，
寧胡豈敢惜風沙。香溪夜夜長無月，紫塞年年始有花。
多少落梅悲糞土，無情最是犬胡笳。

歸宗寺

幽居最愛歸宗寺，勝甲江百山水兼。已有硯池邀逸少，
還餘醉石臥陶潛。六朝烟霧含珠塔，四壁風雷捲玉簾。
况是鸞溪春正煖，飛花送酒舞前簷。

燕臺秋日別繆天自之雁門

燕臺秋色晚來多，一片邊鴻拂雨過。雙闕芙蓉開疊嶂，

九門榆柳落長河
離人衣袂從軍淚
小婦琵琶出塞歌
况是黃雲千里蔽
故園蕙艸總如何

早發大同作

雞鳴人起大同城
笳鼓淒淒出塞聲
青塚風高貂不煖
白河霜滑馬難行
髡鉗昔日圖成事
溝壑今朝欲殉名
枉歷三關征戰地
無絲一奮曼胡纓

章臺

年來無淚灑干戈
遊戲章臺日日過
喜與佳人馳寶馬
愁將壯士挽天河
五陵日落牛羊亂
三輔秋高鼓角多
慷慨不知時命薄
醉中梁父又悲歌

荆南歸興

牢落風塵一蒯緌
荆南空上仲宣樓
家貧豈是無長策
親老那堪更遠遊
巫峽啼猿驚旅夢
洞庭飛雁引鄉愁
英雄不是爲人子
處處沙場作首丘

歸至江東東方丈爾止

今代文章在少微
柴桑以後似君稀
相逢洗藥青谿去
正見銜魚白鳥飛
爾向南朝作者舊
予辭西嶽爲庭闈
好將竹葉除華髮
莫倚臺城送夕暉

逢日者周生賦

知子青囊有妙篇
升沉一爲決皇天
莊生未試屠龍技

蔡澤猶遲躍馬年湖上蟬聲催落照雨中草色染輕煙
離情直與長江水送至梅花大庾邊

壽前刺史彭君

朝漢臺臨百奧雄蒼茫秋色似雲中紅旗晚閃三城日
画角寒吹萬馬風太守聲華高武庫將軍禮數起文翁
饒歌爲爾千金壽醉倒天南紫菊叢

和劉六茹登華

天邊雙華鬱嵯峨萬仞丹梯挂女蘿太乙池中浮皎月
仙人掌上瀉黃河心悲角里芝華少淚洒宗周麥秀多
席捲三秦非此日留侯畫策已蹉跎

浩蕩松聲滿太虛凌峰一把羽人裾軒轅臺迴風飄笛
玉女牕寒露滴書秦地山河明月在漢家宮闕白雲餘
蘇耽未肯乘鸞鶴有母衡陽日倚闌

和人巫峽中望十二峰之作

十二峰橫彩翠長含情不忍上高唐朝雲終古疑神女
暮雨何年惑楚王南國荒淫多夢寐騷人諷諫有辭章
蘭蓀亦愛風流地莖葉青青不斷香

和李生與客上廬山之作

三疊泉門是玉川開當大月翠微邊老人五作奇峰立
居士雙從醉石眠丐地松黃香滿帚穿苔竹笋小成鞭

樓窗面面吞彭蠡嘯落天風萬壑傳

舟經金利作

金利墟邊首夏時家家蠻布有蕉絲木棉花盡猶無葉
榕樹根多復作枝西水正愁雙峽急東風莫使片帆遲
鷓鴣本是催歸鳥啼遍春山人未知

斑竹

斑竹枝枝拂暮煙無情亦自淚痕鮮美人渺渺江雲外
亡國萋萋野艸邊髻散不須悲墮馬魂歸猶可化啼鵲
東風莫卷飛花片留與愁人伴醉眠

江上新晴有作

青山雨過片雲餘水氣空濛望若虛峰似亂流爭出峽
地當西潦半成渠荔花多釀春州蜜榕子初肥滙口魚
白鷺心閒真愧汝經營端爲古人書

靈山寺作

野寺何年闢翠微松門隱映在煙霏聲搖三峽雙鐘度
勢截千峰一塔飛水長魚花隨電出山寒鬼子得霜肥
鳴雞夜半催潮上漁父相將一棹歸

歸舟賦贈柴子

風信東邊見破篷移舟深入蓼花叢雷聲隱隱黃霞外
日色沉沉白雨中山水有情娛我老詩書無術救人窮

疎狂莫作諸侯客，鸚鵡才高命或同。

雨後

雨後江潮鼓大波，黃花魚比白花多。層門故截溪橋出，漁艇時穿海市過。灘灘已知無食好，鷓鴣其奈不歸何。離枝漸熟休狼籍，釀酒持將養太和。

送人自楚之蜀

江帆此去莫霑裳，蘭杜多情為爾香。神女風流滿巫峽，騷人湯沐在瀟湘。東西漢水巴陵大，朝暮猿聲白帝長。

秋氣早不妨，哀怨盡清涼。

蓮葉

絕代名葩，雒下無香分。螺黛十眉圖，花中不辯來。么鳳葉底多疑，是綠珠羅袖淺。將苔色染玉盤寒，愛露華灑姚黃。莫即愁為裏，青帝恩光此獨殊。

蓮葉

東西南北總田田，未作芙蓉已可憐。魚戲不驚珠亂瀉，人擎最愛月多圓。湘纍水屋香誰似，越女羅裙色未鮮。玉漱金塘無闕處，花開一一故相穿。

東臯別業舊址，是陳文忠公遊衍之地。

漁艇猶穿玉帶，橋名迴花灣。不見錦袍，灣名開鷓夷。有恨三

江湧杜宇無歸，百鳥哀菰葉。湖名舊通浮嶽井，蒲香今失

鶴舒臺雲淙亦是圍棋墅一代風流總艸萊公有雲淙別業在白

雲山

答張桐君見題三閩書院之作書院在廣州城南

桐君何事別桐廬來問羅浮桂父居豈有仙人還好劍
繇來高士不知書青樽但使秋常滿白髮從教日已疎
身是湘纍憔悴種忍將詞賦送居諸

贈鄭山人入匡廬

九疊雲屏一玉筇天風吹汝上芙蓉三梁幾處成三石
五老何年化五峰雨勢得殘猶落葉泉聲不斷亦聞鐘
湖光盡入含鄱口月出偏宜紫翠重

石灘舟中眺望

東樵西望是南樵四面芙蓉海上標蜃氣春晴多作市
雞聲夜靜始催潮離支十里雲嘗暖瀑布三秋雪不消
紅翠相迎過洞口尋仙且繫木蘭橈

瀝湖舟泛

峰勢盤迴北斗同瀝湖應與絳河通蘭橈曲曲穿巖口
石乳泠泠滴鏡中雁影尚留炎海雪鶯聲不待落梅風
芙蓉只解窺漁父蒼翠沾衣影似空

珠江春泛作

珠水煙波接海長春潮微帶落霞光黃魚日作三江雨

白鷺天留一片霜洲愛琵琶風外語沙憐茉莉月中香
斑枝况復紅無數一棹依依此夕陽
琵琶洲在珠江之東茉莉沙在珠江西之

悼馬

與爾蒼梧數潰圍艱難得逐大軍歸金瘡乍合頻思戰
画角才吹便欲飛三歲龍駒方早壯兩年香稻亦偏肥
無端一蹶驍騰失淚滴空鞍葬落暉

平湖逢馬培原給諫時給諫被沙門服

平湖雨過白鷗飛有客扁舟薄暮歸明月漸圓居士法
天花猶著比丘衣湘纍夢寐通瑤圃梅福封章隔紫微

去國離家予亦久相逢蕭寺淚同揮

菊

無多花蕊在籬東不食愁將苦蕙同朶朶霜乾猶抱蒂
枝枝露濕已當叢秋來粟里多佳日歲晏陶公有素風
天爲忘憂生此物摘來休使酒樽空

南村未有素心賢閉戶惟將醉石眠孤影甚思名酒勸
白頭微得好花憐餐英一一兼寒葉飲露依依似暮蟬
香入簞瓢霜氣早清齋不必露葵鮮

幾本蕭疎出艸間清霜染得淚痕斑猶嫌太白同衰鬢
且喜微紅上老顏尺寸培根終歲苦東西乞種一身閒

乾來作枕圖明目細作真書寫小山
衰年服餌最相宜甘苦惟應蕙苾知無酒易過重九日
有花難及肅霜時香薰百艸誰能似根浸三泉更不移
長與青青沅澧者春蘭終古一相思

芭蕉

孤心只在葉中央一夕抽開二尺長
不雨寒聲猶滴瀝無風疎影已清涼
全遮北郭芙蓉館半拂東鄰薜荔牆
結就香牙甘美甚霜時割得一梳黃

菜

菘芥初生摘未稀窺園不及下書幃
能知歲月惟青艸

解讀春秋有白衣子母三冬瓜蒂苦君臣
一代蕨花肥桔槔亦是忘機者引得流泉下翠微
園蔬自種向西疇食肉無心作虎頭都尉牛羊終見辱
野人葵藿未忘憂胡蔥大葉穿沙早越薤長莖出水秋
未作老農先老圃荷鋤長得在羅浮

黃桑白柘繞蓬廬每恨場師我不如
微菜春烹惟瓠葉小鮮秋薦但鱸魚
牛羊影亂天將暝蟋蟀聲寒歲欲除
閒學憲王圖本草贈人還有種葱書

重至都虛觀作

石勢盤迴下翠微峰峰有瀑似煙霏
參差古木穿松出

掩映寒花間葉飛白髮休教毛女笑黃冠好逐羽人歸
仙壇歲久無香火欲掃莓苔恐濕衣

仙山鎮日白雲封磴道依稀四百重分去祇成雙瀑布
合來元是一芙蓉臺邊月作麻姑鏡洞口風爲羽客鐘
古觀無人華葉滿鹿麕行處有遺蹤

舟經晉康奉訪州使君有作

大小湘流繞訟庭使君日對數峰青西將錦石爲天柱
北倚香山作玉屏白鹿春行蒲媪地嘉魚冬膾大中亭
舟過欲識神明守未忍揚帆入杳冥

忠養堂書懷

無才不敢恨長貧老大惟知與道親
杖高堂多古物衣冠中土有遺人
碧梧早落過芳歲黃菊遲開及好春
繞屋雲山無路入一家雞犬自先秦

奉和澹翁六叔父開春病起之作

花爲春寒未海棠猶餘梅過立春香
憐翁身入新年健與我情同愛日長
吟處自能空海嶽酒中那得有彭殤
消除白髮詩篇在况有知音在草堂

五嶽歸來一艸廬依依桑梓未離居
弟兄遺恨無三謝父子追歡有二疎
石路乾時人引杖花窗靜處鳥窺書
從來養壽惟芝艸綺皓何人便不如

四百羅浮在枕邊一年春向一峰眠夢爲蝴蝶元非我
生作蜉蝣亦是仙服食儘多真日月經營終少幻山川
逍遙見說須無待姑射神人本自然

獨酌

時丙寅春
五十七歲

歲月無多歎逝川七旬更待十三年忘憂却在難忘處
學道還如未學前黃鳥竹間催獨酌白鷗花下伴閒眠
藏書不少名山業兒女他時各一編

洪州喜遇京口宋君

滕王閣下繫扁舟尊酒相逢慰遠遊京口英雄能六博
君卿意氣動諸侯烟生南浦漁帆隱雨過東湖雁影秋

一代只今高士少故知磨鏡自風流

季秋之五日承諸族父過賞菊梅分賦

未及重陽菊已披梅花數朶映霜姿頻將春色添秋色
不惜寒枝作煖枝甘苦已教陶令識芬芳更與阮公期
竹林相過須沉醉莫待登高倒接籬

閨怨

限一二三四五六七八九十百千
萬雙半寸尺丈凡十八字並限韻

六七鴛鴦戲一溪愁人二十四橋西半天書斷三秋雁
萬里心懸五夜雞蠶作百千絲已盡烏生八九子初齊
丈人何處聽鳴瑟尺寸長垂雙玉啼

桃三李四已成溪六七花東八九西一尺髻高愁墮馬

五更衾冷怨鳴雞游絲百丈全難斷舞柳千條半欲齊
十二雙邊無寸字鴛鴦都作萬行啼

二六巫峰七十溪千迴萬轉入林西頻同半槁三花樹
不及雙飛一錦雞四角盤中書易就九枝燈下影難齊
春絲百丈牽方寸愁掩羅巾五天啼

對水仙花題画中水仙花兼紫芝怪石

凌波看與宓妃同半在丹青半水中香氣分從冰練出
清姿交映玉壺空先春著粉教如雪向夕生寒不待風
最是芝華相伴好太湖石上一叢叢

花朝前二日小集澹翁園林觀落紅有作限塘

字

一夕花流滿曲塘半沾泥滓尚紅粧子鵲血灑朝煙濕

謂杜鵑花

巫女魂飄暮雨香

謂蜀茶

已落祗堪貽下女未開猶

可待東皇啼鶯莫向尊前怨春事明朝定未央

望羅浮

大小麻姑雨過時白雲開處見春姿芙蓉影滿三千鏡
紫翠光生四百眉瀑布東西金滅沒石樓高下玉參差
當年坐臥青霞石亂長苔花不可知

東樵南望卽南樵蒼翠相連似不遙亂著峰眉深淺色
爭飛瀑布短長條曾從玉女窺明鏡亦上麻姑弄紫簫

多謝白雲情太甚飛來一片屢相要

玉女麻姑皆峰名

永安紫金山眺望有作

繞縣芙蓉四面來紫金為枕玉為臺一樓西接雞冠出

三殿東連燕尾開風外二琴聲在水雲邊雙髻影當梅

夕陽蒼翠合煙火候月城頭一舉杯

雞冠燕尾二嶂名二琴謂南北琴江

三殿雙髻皆峰名

水從丹嶂五江分流入秋鄉似白雲古渡鐵潭花漠漠

疎林火帶葉紛紛穿城汲影烟中見隔嶺樵歌月下聞

繫馬樓前貪極日描眉峰好景思君

鐵潭渡名火帶溪名指眉峰名江有

五江在縣境

鍾山

高高雙巘削屏風紫翠晴飛萬井中一自軒皇成寶鼎

遂開天闕作玄宮千秋龍虎歸真主六代烟花送狡童

歲歲貂璫馳傳至櫻桃春薦思無窮

蒼蒼輦路但斜暉月出衣冠事已非六代松楸辭玉殿

中峯陰雨見龍旂蠻奴小隊呼鷹過漢女春魂化燕歸

多少哀笳吹不散五雲猶繞御床飛

沙河悵望

百二關山起太行鞏華宮樹曉蒼蒼諸陵水落沙河濶

十口雲連碣石長士馬當年悲雨雪君臣此日怨參商

居庸欲度頻回首弓劍天邊白露涼
環天壽山有十口諸水皆逕陵橋以入沙河

金山口恭謁天下大師墓

讓帝飄零海嶠東龍歸猶識未央宮
風雷豈敢疑周旦禾黍何當怨狡童
父老爭迎靈鷲錫山河如棄鼎湖弓
傷心陵墓無封樹秋艸離離白露中

平臺

在天壽東山口內一里成祖嘗駐蹕焉嘉靖十五年命作亭于上名曰聖蹟十七年四月駕幸平臺祀成祖于臺中

翠輦紅旗去不還平臺一片朔雲閒
宮邊流水通諸口陵後黃花控二關
俎豆中宮修漢臘松楸南國慘天顏

玉環何日歸廷尉流落龍沙戰血斑

宣府道中

花園北抵鴛鴦濼一路闕氏往蹟多
恒嶽白雲連上谷桑乾春水接洋河
紫髯日市牛羊入紅粉時吹簾策過
此度關山無內外漢時空費羽林戈

宣府平古

遼后宮臨鎮朔臺明君祠傍拂雲堆
天寒鷹隼三關落日暮牛羊四野來
幾日玉鑿榆木返無邊毳幙止都開
遼東一臂連宣府誰使寧王罷鎮回

大同作

飲馬東連白道泉，桑乾西接紫河烟。
何年代邸淪秋草，幾處秦城出遠天。
事去英雄羞一劍，時來游俠喜三邊。
哀笳莫奏思鄉曲，都尉臺前月正圓。

塞上感懷

未有英雄羽化期，茫茫一劍報恩遲。
天寒射獵龍沙苦，日暮笙歌塞女悲。
太白秋高空入月，黃河春暖又流澌。
鬢邊一片天山雪，莫遣高樓少婦知。

岔道

軍都下視居庸險，北口高懸太乙軍。
一自中官迎白馬，至今新鬼哭黃雲。
山連陰嶽當關合，水抱榆河入塞分。

城外風沙橫一路，雲州西去恨無羣。

舜廟

虞帝時巡北嶽還，翠華南駐雁門山。
千秋王殿臨邊起，萬里龍髯出塞攀。
雪盡滹沱穿大鹵，雲生句注失寒關。
竹書多少龍魚恨，空有皇英慘玉顏。

重過易水

年年易水弔荆軻，總奏平生變徵歌。
上谷悲風吹淚盡，紫荆斜日傍愁多。
驢老去空知路，鴻鵠高飛亦受羅。
好向城西更沽酒，英雄惟有玉顏酡。

華山作

青天低插芙蓉亂白帝高臨落雁孤大乙西來朝紫翠
首陽東走入虛無仙人博戲凌丹壑毛女琴聲隱玉壺
萬古雲霄隨變化秦皇漢武莫能圖

望嶽

千里瀟湘帶嶽長芙蓉九面鬱相望五峯蒼翠連雲夢
一水奔飛下石梁欲訪禹書登岫嶠兼觀海日出扶桑
水簾洞裏通浮嶠便逐仙人返故鄉

嶽中水簾洞
與羅浮通

朱鳥天邊配五峯湖湘倒映翠芙蓉白雲冉冉香爐出
古洞陰陰玉簡封一氣衡陽生帝子十年南極見飛龍
遺宮縹緲無尋處日暮空聞嶽麓鐘

長沙秋望

雨過星沙楚望開天邊王氣尚昭回蒼梧倘得重華返
紫蓋應朝南嶽來父老謳歌思帝力君臣馳逐失龍媒
茫茫秋水雲吞夢騷賦空投二女臺

壽尹丈

日出羅浮紫翠重芙蓉爭繞老人峯天醫四皓生芝艸
漢有孤臣在赤松坐處花深靈壽几夢餘風過囉真鐘
山公膝下能娛志春酒今朝沆瀣濃

過某將軍北山草堂賦贈

英雄無命合知還欲作浮雲自有山身在不忘金勒馬

夢飛猶向玉門關
橫行人望三軍出
高卧天容一日閒
落落長松風籟好
吹人不使鬢毛斑

晴川閣作

峩峩川上兩飛樓
樓下烟波一片愁
大別中分江漢水
金沙東接鳳凰洲
騷人一去無芳艸
帝子重來有古丘
可惜湖南空轉戰
三年不見漢時秋

黃雀樓

西上飛樓眺夕陽
仙人黃鵠兩迴翔
九江秋水連雲夢
十里芳洲帶武昌
詞賦自堪懸日月
冠纓誰與濯沅湘
三閭亦可爲漁父
一棹烟波樂未央

漢日

蟠冢東來漢水長
二湖相夾似瀟湘
陰陰楊柳雙堤合
粵冉芙蓉萬井香
古屋龍蛇趨夏后
大江烟雨隔娥皇
南雲北夢無窮路
不待登高已斷腸

送人度梅嶺

天作長城五嶺間
雄州繚繞萬重山
越王舊治梅花國
秦帝初開大庾關
紅葉影中雙騎去
白猿聲裏一人還
乘時自有臺侯業
莫使鄉愁上玉顏

東孔君

世事茫茫總苦辛
肝腸空與孔融親
天教魯國餘男子

代有湘纍是怨人鸞鳳自應栖枳棘驂騑那得絕風塵
堪憐夜夜同明月相照愁心滿海濱

吳聞卧病有作

天山南畔對秋空此日金閨寂寞同蘇武飢寒甘嚼雪
要離細小畏迎風思將爪髮爲神劍未有精誠與白虹
蒲伏不妨長乞食霸王遺烈在吳中

楓葉蕭蕭掩市門秋光雖好易黃昏人憐白喜方同病
帝命巫陽更予魂楊柳東西朱戶映芙蓉七十白波吞
人間未有琅玕實飢鳳啾啾好自存

三秋蕭瑟虎丘西山鳥多情爲客啼季札悲愁新喪子

梁鴻清苦早同妻紅蓮稻美春應熟錦帶花多采不迷
林屋洞邊風物好何時得共夏黃棲

逢商丘宋使君賦贈

相逢數數問戶門烟草蒼茫往跡存豈有屠沽藏魏市
空餘詞賦在梁園千秋公子無賓客一代才人是弟昆
意氣未傾愁已別微軀自此更何言

采石題太白祠

才人自古蛟龍得太白三閭兩水仙詞賦已同雙日月
精靈還作一山川江間絕壁丹青出木末飛樓俎豆懸
千載人稱詩聖好風流長在少陵前

朱紫陽嘗謂太白聖于詩祠上有亭

當翠螺山頂子
因題曰詩聖亭

牛渚西江月色新清光長見謫仙人詩多諷諫因天寶
道在佯狂得季真金鉉已銷飛燕口錦袍空映鳳凰身
垂輝不用多刪述天與英雄只老春

次燕子磯

半壁斜開紫翠圍中流橫作釣魚磯沙洲定為真龍長
鏡縷難迴燕子飛江北每傷當日棄南陽長恐故人非
東流不盡興亡恨淚洒秋風一棹歸新長沙洲抱磯長
江口不見洪流磯勢外何國初占
有外藩不臣嘗以鉞縷維繫之

贈水師某總戎

將軍南達海門牙幕府東臨若木花白馬潮來驚日月
天雞聲起亂雲霞三城帶甲隨秋戍千里樓船奏暮笳
早晚行人返桑梓沉香浦上託為家

九星巖

星巖勝槩甲瀧東玉乳泠泠下碧空萬壑芙蓉生洞穴
千林薜荔隱房櫳雲根氣作朝朝雨石角聲含夜夜風
桀寇相隨宜此地振衣時上玉虛宮巖有石窾吹之
作角聲名石角

永安州道中作

蒙山蒙水古蒙州烟瘴千年毒未收獐女盡能欺虎豹
欄房一半與豬牛畬田處處燒陰木水碓家家截上流

無限鷓鴣啼不斷未行先憶故鄉樓
自荔浦至平南民
獐雜居不可辨識
大抵屋居者民欄居者獐欄以木架起如樓上以柵人
下以柵羣畜名曰欄房亦曰高欄狼則不然自荔浦至
平南多獐人自潯
陽至貴縣多狼人

黃雀樓

樓爲獻賊所焚今移
故楚府敕書樓重建

巍巍猶是敕書樓朱邸移來歷幾秋黃鶴不將仙客至
白雲空爲楚王留三年士苦長沙戰萬里人含落日愁
芳草莫重悲賦客江邊鸚鵡已無洲

天門山

秣陵門戶是天門雙峙天邊紫翠屯落日雲連牛渚暝
中秋潮長小孤痕
潮汛至大通而止惟
元夕中秋可達小孤千年王氣從今

起萬里江聲至此吞南北自來爭采石開平功業與誰

倫
采石有開
平王廟

蠓磯謁靈澤夫人廟

夫人孫權之妹漢昭烈皇
帝后也昭烈崩聞至自沈

蠓磯

靈澤夫人死漢家何殊二女殉重華瑤姬一自辭巫峽
精衛千年恨海涯國賊豈能分曆數天威猶自振褒斜
永安哀詔驚聞日飛淚應沾白帝花

一逐長江下楚雲翠華望斷淚沾裙少康興日因姚氏
帝乙歸時是女君花落錦城先主憶月明瑤瑟逐臣聞
徽稱不愧同昭烈終古蠓磯享紫芬

白嶽

拔地香爐是一峯長雲繚繞帝城重千年楠樹青霄出
百尺龍牀碧蘚封巖岫影連天子郭風泉聲亂羽人鐘
天門久坐飛花上鸞雀紛紛不可從

嶽頂玄帝殿右
額曰雲裏帝城

姑孰道中遇施虹玉返新安

時聞其
親患病

姑溪相見即分飛迢遞新安觸暑歸藥石分將慈母苦
雞豚餘得故人肥蘇耽亦念家中井萊子頻沾道上衣
此別泐泐珠海上書來先說是庭闈

寧都魏叔子季子隱金精山詩以寄之

螺川南上更登艫灘盡高臺見鬱孤秋氣驚來江上早

雪花吹到嶺頭無天留一劍知何意人在三門尚有徒
不嫁長沙仙女好金精高卧亦良圖

上十八灘

灘口雲峯萬朶迎崩波直下虎頭城聲含亂石雷霆怒
光出陰崖日月生天險豈容南越得時艱先使贛江清
橫穿瀑布三朝暮上盡黃牛水未平

雙帆傾仄入洪波勅敵其如巨石多水底風雷爭噴出
烟中林岫暗飛過蛇蟠有氣吹黃葉猿飲無聲下綠蘿
未至儲潭猶險在且從中道玩巖阿

度梅關作

苦恨秦關一道通人如去雁與來鴻梅花但爲臺侯植
錦石難同陸賈封五嶺繇來稱塞上三城久已作回中
越王留得多豪俊戰敗屠睢最有功

八度人關逐雁飛寒門北去暑門歸黃金結客無衣食
白首爲家有翠微天下侯王須漂母先朝臣妾盡明妃
頻來空使梅花厭未見龍沙一奮威

梅關上有
額日人關

過某明府金紫山莊作

解組歸來已有年韓城猶憶使君賢家鄰大庾因梅樹
夢繞羅浮爲酒田令子秦人矜勇力新姬吳女鬪輕妍
蘇卿墓上松南向羨爾曾攀漢代烟

君生子
于秦

過華林寺作

芳華舊是劉王苑咫尺鸞潭見海天蝴蝶繭從仙獄至
菩提紗向帝京傳光流故國餘明月魂傍孤城作暮烟
春艸似含南漢恨依依隨客到花田

七夕咏璇璣圖

佳人織錦按河圖天上璇璣得似無文字能令琴瑟好
風流悔使蕙蘭孤牽牛此夕逢天女白兔他家憶故夫
手爪如君皆巧絕更誰山上采藤蘿

南海神祠作

扶胥江口水微茫簫鼓人祠百谷王萬派洪濤朝漲海

千秋絳節奠扶桑參天花倒龍宮影浴日亭浮唇氣光
聞道漢皇東渡急馮夷先爲駕鼉梁

寄魏處士

女中高士金精卧君亦狂歌在上頭王蠋自能存社稷
許衡那解讀春秋青天一半開奇石白水千家截怒流
教授莫辭多弟子異時王佐有人求

初至漢陽賦贈王別駕

鸚鵡洲西却月前茫茫江水接空天郎官佐郡還三府
夏口行春已六年北關早知延尉直南樓重見庾公賢
漢陽有樹皆楊柳未識栖烏向那邊

贈南雄某總戎

秦時南塞此雄州鎖鑰憑君控上游霹靂泉邊開大帳
梅花國裏坐臺侯家存兩代山河誓地接三城鼓角秋
幕府只今才子在移家吾欲傍風流

徐君自江左來廣賦贈

秣陵城北是花城花到君家色倍明黃菊去秋容我摘
白鷗今日逐人迎秦時梅嶺猶天險漢代崧臺亦帝京
憑弔定知紛涕淚江南人物本多情

得郭清霞書言欲歸老羅浮詩以速之

已報羅浮四百君君歸重挹翠氤氳金精不嫁長投髮

玉樹無親但抱雲象數早從仙易得文章應使世儒聞
芙蓉砂好皆塵垢丹竈何勞吐紫芬

秦風最善咏蒹葭我亦伊人在水涯南越重來應有主
朔風一別遂無家仙人棲託元東莞令子絃歌是白華
同在瀟湘吾獨返相思頻寄海天霞

廣州弔古

山川靈氣會都司舊作佗宮枕海濱一自名王來駱越
至今天子盡屠耆無才絕道稱南武有恨祠天殺貳師
邸第荒涼餘白艸牛羊躑躅爲誰悲

白雲山下卽龍堆舊日丁零大帳開奇畜盡從沙漠至
遠人兼帶雪霜來無多越女留炎微不斷明妃去紫臺
朝漢有誰還朔望雕青天子在蓬萊

三峯飛入越王城上有呼鑿古道平氣似穹廬千里接
風飄笳鼓一天清禪王父子爲燐火絕塞牛羊自盛京
山鬼招人歸白墓日斜林外有歌聲

懷仙曲

花人高雲月上天美人相繼作飛仙棺中綵履留何處
臺上青禽去幾年織錦悔教來粵嶠鳴箏休更問秦川
鴛鴦最是多愁思未到黃泉已化烟

壬戌清明作

朝作輕寒暮作陰愁中不覺已春深落花有淚因風雨
啼鳥無情自古今故國江山徒夢寐中華人物又銷沉
龍蛇四海歸無所寒食年年愴客心

焚香作

夜夜焚香到曉鐘鳴琴亦未綠塵封詩因五嶽辭多怪
酒得諸花味更濃欲補圖經先太華將營服食首喬松
乘時未敢頻爲客燕雀卑栖且一峯

壽水部太翁

水部風流動禁闈袞衣持作老萊衣天將一老留東海
國有孤臣在少微羽客羅浮來鳳子仙書林屋得龍威

退朝清興多絲竹一一笙詩奏不違

望晉恭王園

襟帶河汾玉殿長一朝弓劍委秋霜將軍死戰裒寧武
帝子生降恨晉陽馬首關山空落日城中歌吹罷清商
悲風處處吹松柏誰到并州不斷腸

南鎮

稽山形勝配朱天漢帝登壇肅豆籩玉笥宮藏神禹簡
香爐峯拒祖龍鞭風雲有氣生潭口虎豹無聲立洞前
十道河山勞作鎮更扶黃屋斗牛邊

墨胎

九世商侯是墨胎盟津肯爲武王來千秋書弑堪爲法
一代無臣正可哀灤水風悲孤竹里首陽雲掩采薇臺
黃農虞夏歸無處多事天生寸亂才

范蠡

浮海鴟尾一棹多飄然應自老烟波身全豈合爲齊相
賈累將無愧越娥子死千金當市井師遺一策是巖阿
會稽山下餘湯沐士女猶傳采葛歌

豫讓

豫子元非刺客人青笄亦復識天倫襄君未肯誅塗面
國士絲來重漆身三躍自應教出血二心端欲愧爲臣

悲風亂激汾橋水長使行人淚滿巾

信陵君

居門一自請侯嬴功業頻垂蓋代名六國兵歸公子將
諸侯客向信陵傾秦來早有河溝患漢過難忘俎豆情
毛薛復能令救魏始知賢士貴逢迎
函關西逐虎狼驚反間頻教事不成六國安危公子在
三年荒宴大梁傾難忘晉鄙猶多客未斬蒙騫更進兵
合縱自能存肘腋不須賢佐得阿衡

虞卿

躡屩邯鄲路未迷頻捐萬戶去栖栖知人未得逢無忌

急士終難救魏齊窮有春秋猶可見愁因公子不須啼
艱難空使侯嬴惜白首無歸肯向西

聶政

鼓刀難隱姓名深車騎何來知己心仲子殷勤能具酒
夫人麤糲敢辭金直誅韓相驚雄劍不使秦王待雅琴
有姊悲哀頻殉義豈須皮面向刀砧

魯仲連

允生玉貌豈求人一笑全周四十春飛兔只應向東海
貪狼那肯帝西秦三公不易惟貧賤百世堪師是隱淪
此日鮑焦方抱木非時難保白雲身

名駒千里不能干徐劫難將弟子看不使田巴談饜
非關無忌救邯鄲山東一一知高節海上翩翩有釣竿
傲儻只今思畫策布衣未信立功難

伍子胥

簫聲淒苦入吳來隱忍能成報怨才縣目鱗門觀寇入
爲濤江上盪賊開越人白馬何勞祭范子鴟尾亦可哀
入郢便應頻解印姑胥那忍更遲迴

燕昭王

燕昭信是霸王才得士望諸自魏來故鼎遂能歸磨室
黃金不枉築寧臺七雄獨爾爲宗國一戰還堪振有郅

誰肯千金充駿骨功名真自郭生開
君臣甘苦總相同二十餘年且暮中
湯武仁聲雖未洽春秋義戰此爲
雄王前久已無師友天定那能善
始終三代至今人物少樂君真有
卧龍風

趙武靈王

夢裏棊聲得孟姚英雄此劫恨難消
美人一入吳娃館公子頻從主父
朝西上黃華河活活北窮大漠草
蕭蕭雲中有路堪南襲長使秦人
氣不驕

四戰功高屢致兵河西攘地出長
城招來騎射三胡畏馳入函關六
國驚上帝若能憐簡子美人何得
與娃羸

英雄自作沙丘禍霸業傷心竟不成

荆軻

當年神勇是荆卿市上悲歌最有情
豈必英雄工劍術未應生劫待棊聲
從容不俟蘭池客慷慨空偕豎子行
枉使秋風吹易水白冠相送淚沾纓

蔣相如

鼓瑟邯鄲最有名秦王亦爲奏秦聲
九賓未禮陰懷璧五步何勞盛設兵
御史直書真勇氣將軍多讓豈私情
雌雄不滯誰能似心折風流是長卿

宋武帝

司馬本爲神漢賊寄奴真是楚元孫中興自可爲昭烈
薄伐曾經至太原九世深讐雖已復千年正統未能存
劉何倘識春秋義應向君王拜手言

呂不韋

休言仲父更何親自是西皇太上身陽翟千金方返楚
邯鄲一女已亡秦春秋有作歸商賈賓客相將盜聖人
風俗至今倡樂盛史公何忍記桐輪

李廣

秋風吹老北平城飛將增人慷慨情長臂雙如猿有執
大黃一發虎無聲隴西風節羞降敵武帝恩私悔請
一石自從深飲羽至今鵬鷲過猶驚

和人岳王墓

鄂王墳上哭南朝聲落錢塘作暮潮鴟革有膏成碧玉
蜀鏤無氣上丹青松楸亦向黃龍指風雨難將白馬招
今日却思和議好沙塲不恨失嫖姚

登岱

渺濛一氣自天孫日月雙觀各有門萬物盡從青帝出
諸峯都讓丈人尊松間風雨秦時響石上烟蘿漢代痕
最是白雲多變怪誰從觸石見真源

魯宮

兗州聞有魯王宮未毀靈光與漢同可作東周惟曲阜
自來宗國是龜蒙龍興定在高皇後日出嘗瞻大海東
碧瓦雕甍勞父老年年淚灑燕泥中
玉殿猶存泗水旁何人海外尚從亡難教會稽還尊魯
未作沙陀肯立唐詩在諸侯偏有頌史書正月獨知王
波臣有意存遺腹會見朝宗是少康

漢關

黃雲不逐錦車還望絕天南有漢關青塚易成蘭麝土
紫臺難作苧蘿山空將春色歸龍塞豈有長城在玉顏
才似少卿人更恨相逢無計與刀環

和人北固山下作

垂竿四十九鱸魚北固山前我不如花艸無情先白下
江山有恨首南徐金焦浩渺空天險龍虎盤迴豈帝居
最苦流鶯催淚易聲聲都是六朝餘

南海廟作

南越人祠盡祝融章丘乎處有行宮三江水到扶胥大
萬里天歸漲海空潮汐舊從獅口入旣檣新與虎門通
天留一島蒼茫外可惜田橫事不終

扶桑影逐海雲過蜃物春來變怪多日暖羊城來士女
月明龍戶有笙歌家家水帝祠南海歲歲天朝使暹羅

漢將神靈銅鼓在風吹音響滿滄波

木末亭

木末亭臨萬井中遙遙正對孝陵宮九原未肯成黃土
十族猶然吐白虹自古以來無此死教人不忍作愚忠
雨花臺畔啼鵲滿血染靡蕪一片紅
想像忠魂在舊京君臣自此益深情佯狂豈是三仁志
哀痛猶傳一代聲往日衣冠留木末只今俎豆失江城
無多書種難留汝恨絕興王不愛名

兩粵督府祝嘏詞

斧鉞東臨屢有年蠻方人賴衮衣賢不將南庫歸京闕

自作長城控海天七朶芙蓉珠斗曲一輪明鏡玉臺圓
無多香尉留州郡盡沐清風嶺嶠邊

鴛鴦蓮

友人池蓮歲癸亥有一花
色兼紅白以鴛鴦蓮名之

雄白雌朱一朵中鴛鴦共命恰相同東家傅粉嫌全素
北地調脂愛半紅池滿絕愁羅襪濕月明頻使玉壺空
田田葉裏開無數獨爾雙飛入葢宮

贈墨西

姬人姓陸生于高要之布水村與端溪密邇
予得之使朝夕在研之西磨墨供予揮洒故
字之曰墨西爲詩贈之

香溪一片卽端溪采得姬人字墨西水玉朝朝磨削筭
松烟日日染柔荑教成小楷書難已催作新詞唱未齊
善品水巖諸甲乙青花白葉滿中閨

琉璃研匣鎮隨身墨愛君房古色新王勃三升頻飲我
青蓮百首每催人初來往往春葱破久立時時翠黛顰
日用一螺殊未足不曾渴筆致卿嗔

少小長齋繡佛前前身應是散花天毘邪一見全無病
居士相依祇爲禪每乞研金書梵唄時教潑墨作雲烟
爪痕多在曹娥帖紅染蠻花半鳳仙

贈香東

予得姬人陸女字之曰墨西越數日復得東
宦石氏汝使之司香而字之曰香東爲詩贈
之

鎮日盈盈斐几邊裙裙出入有餘烟含辭已似黃馨吐
取氣還將黑澗煎作配文人非艷福托胎香國本真仙
心花意蕊開須早證取圓通鼻觀禪

才名偏得鳳凰心肯卽雙雙果玉琴青鳥使來王母國
絲衣人出女香林袖中玉斗羊脂滑牀上銅爐翠色深
暇日每將黃熟揀珠蘭薰麝比兼金

綠珠自昔生南越碧玉絲來出小家典却寶書爲玉帛

迎來香室作烟霞青絲覆額如雲短翠暈拖眉半月斜
十五有餘弦未下水輪一倍吐精華

送人入巫峽

看殺芙蓉十二圖黃牛朝暮一人孤生當絕峽誰求女
化作名峯亦望夫辭賦不愁遷客少夢魂得似楚王無
香溪更與高堂接莫弔明妃淚似珠

重至何仙姑壇作

瑤壇東北是羅浮仙女殷勤爲二樓飛雪不教蕭史贈
采珠那與宓妃遊紛紛作使來么鳳一一翻飛向藥洲
輕舉只須能服食羽人何必問丹丘

奉和嚴藕漁宮允蒙恩予假南還述懷之作次

元韻

恩深正可遂初衣勇退繇來世所稀吳地菰蘆還獨往
漢家鴻鵠已高飛光搖白蕩多漁艇勢截長江有釣磯
咫尺桐君相伴好客星苗裔未全非

敕取新詞內使催中堂持草入蓬萊玄成諷諫書金上
太白清平賜錦回北闕鷓鴣方接洽西山松菊又歸來
東隣嫁畢今無女歌舞何人更作臺

三時晴雨望高旻沮溺無心笑問津香艸未能忘楚國
桃花那識有秦人春秋義向漁樵重日月書歸草野真

遠志何妨爲小艸君歸更臥惠山春

炎方且爲荔支留藥市東邊問伯休三島易尋徐福國

五湖難上大夫舟珊瑚樹待漁竿拂簷萄花期野寺遊

寄語嘉禾供奉客更拋宮錦鳳池頭

供奉客謂朱錫鬯

舟入新興江將訪柴子有作

不知江口水聲分舟入千巘只爲君春盡林香猶作瘴
雨餘山氣未成雲白魚捕處禽多翠甘艸銜時鹿有群
咫尺松杉煙靄隔一峰長嘯萬峰聞

送潘次畊太史

鶯脰銀魚蟹紫鬚垂虹更有四腮鱸君歸正及秋天爽

人去應同夜月孤衆女白來讒宋玉使君今復誤羅敷

相如病免風流甚辭賦紛葩出酒壚

門外烟波卽洞庭船浮鴨嘴出空冥休將拙宦慚漁父

更把狂奴笑容星蒨紫秋來調玉鱸梅紅春去醉香涇

蛾眉揚罷愁鄰女未得相隨返翠屏

謂朱竹垞

贈施少府

錢塘佳麗在才人別駕聲華動紫宸五嶺只今勞五馬

三城自此似三春應悲南庫惟珠海且喜東籬有葛巾

計畫軍儲多暇日相過詩句鬪清新

壽李番禺

青蓮昔愛崔秋浦鮑靚今留葛稚川清露自餐浮嶠外
白雲那到訟堂前難逢一代循良令欲獻長生內外篇
詞賦已光山水縣風流更有艸書傳

小除夕讌集紫閣觀察署中同用杜少陵秋
興第五首韻

華燈一一似朝暉費盡明珠作九微銀管競從文帥奪
玉杯紛向酒龍飛葡萄點茗香頻至鸚鵡開花影不違
照映使君分歲席水仙無雪亦能肥
唐玄宗嘗稱張曲江爲文中元帥使君別號曲江故云

峽裏

峽裏千峰似堵墻時時陰雨見羶羊雙江吐納桃溪口
一水滌洄蕉利鄉潮到蒼梧鹹味薄春歸員屋石花香
鷓鴣知是多情者日日催歸使斷腸

棧道盤迴出萬峰千金鑿破幾芙蓉心悲化石秦時女
淚灑啼猿漢代松巖際海棠終歲見林邊山翠有時逢
斜陽野戍休催泊乘月思尋峽口鐘
山翠鳥名

無題

煖老雙雙燕玉同况多沈水藝熏籠馬纓蝴蝶粧都好
鶯粟纓桃笑總工春色全歸朱閣裏輕寒半入玉杯中
紫烟不斷香狼藉曲曲雲屏隔盡風
馬纓蝴蝶二粧名

紅梅

生當屋角恨多陰
幾朵微紅半吐心
暖處易香嫌日薄
寒時難落怕風深
休教摘去圍雲髻
且使移來傍玉琴
小小相思憐不啄
枝間久立忽穿林

相思鳥名

自滿澗入濂泉寺作

陰陰灌木夾山蹊
入石穿泉路易迷
虎去未寒苔上跡
蟬來忽斷竹間嘶
蒲根可食因多節
葉背堪書爲少泥
不雨水簾成滴瀝
夢魂清絕寺樓西

送姜克猶歸山陰

深秋豈是送君時
落葉哀蟬悲復悲
青歲自憐多獨往

白頭人恨少相知
風流南國無詞客
秀麗西家有美施
爲向若耶溪上問
蒼蒼苔色幾人思

贈黃叟逸閒

八旬有二鬢如絲
見我能文十四時
天爲無書留古老
人因有道得期頤
山蟬夜咽寒泉響
海鶴秋高白露姿
拾蕙相隨吾未厭
西郊煙水歲寒宜

汪子栗亭右湘吳子綺園屬山僧師古畫黃山

問子寄予爲六十壽詩以酬之

黃山黃海白雲開
画取芙蓉六六來
三道天門三瀑布
一枝石笋一丹臺
煙霞作壽憑仙筆
嶽瀆難生是逸才

知爾竹林相待久會將舟向阮溪迴

一松繚繞一芙蓉松似藤蘿不似松偃蓋倒生多至地

飛枝斜出亦成峰雲林掩映皆巢鶴石笋參差是籟龍

多謝山僧能画得蒼髯巧作老人容

答黃扶孟

新安耆舊在人間不住黃山住白山司馬已能干賦熟

大春那得五經閒喬松自愛龍鱗老衰鳳誰慚雉子斑

念我白頭依膝下賦詩頻寄臥雲關

與君心結廿年知剛述垂名歲月遲太白狂歌人欲殺

少陵儒雅自能師長生但向文章得不死何須藥餌持

待我雲峰三十六饑來亦復一茹芝

喜謝修五歸自高涼

久戍高涼宦未成悲歌日日答猿聲炎天少雪頭難白

瘴海多雷夢易驚家在長于迷去馬歸乘春色聽流鶯

新詩字字干將似一片寒光照不平

過馬佐領克起粵秀山房賦贈

一峰飛向穗城頭下有書堂傍藥洲驃騎不曾馳蹋鞠

征南祇愛注春秋朝臺古木穿雲上越井寒泉抱石流

多種芭蕉無暑入相將壺矢綠陰留

玉山南枕艸堂偏門出呼鑿古道邊九眼泉華朝吐雪

五層樓影暮含煙芙蓉秋到惟知醉楊柳春來只解眠
笑道將軍詩總好辭場戰勝勢無前

過林子本茅艸堂奉答見贈之作

城東勝地是長塘汝作松坡一艸堂蘭蕙不教花箭少
荼蘼肯任露華香依依白首惟春色隱隱南朝祗夕陽
念我多情同庾信平生蕭瑟在辭章
開徑相招喜地偏因君來枕素琴眠黃花有節忘甘苦
白酒無心問聖賢山色每含朝雨冷海光時奪暮霞妍
貧中自得新詩贈不覺蠲愁涕淚邊

集梁季子齋分賦得魚字

故人有弟鳳城居門外寒塘洗藥餘苔色冷含丹嶂影
花光晴出綠天書香鱗正美櫻桃頰紫荔兼來翡翠墟
語我甘灘垂釣好潮平潮落總多魚

杜鵑花

杜鵑開及杜鵑啼朶朶猩紅踏作泥望帝春心煙雨外
蠶叢故國夕陽西將歸有客愁三峽再拜何人憶五溪
血灑至今花瓣濕鶯銜不忍過香闥

花朝讌集湯氏園亭作

緋桃掩映画橋東春到花朝影盡紅作暖池塘初有雨
吹寒楊柳只多風流鶯一一笙歌裏戲蝶紛紛士女中

但使主人能愛客名園易與辟疆同

立秋後一日崔氏樓雨望

秋來一日卽霜天細雨生寒盡作烟海氣不分平野外
山光如在夕陽前穿簾乍入蕭蕭葉繞樹長嘶咽咽蟬
樓好欲當明月立催人何處暮鐘傳

梅

紛紛桃李臘前開豈意春初尚有梅人戴一枝爲寶勝
鶯銜數片作香胎隨風未肯沾泥去化雪猶思入酒來
靦面能令顏色好參差兒女滿粧臺

乍得

乍得春風不自持無人亦復舞腰肢白頭最恐花如雪
青鬢偏憐葉似絲有恨黃鶯聲咽咽無情紫蝶影離離
風流好向靈和殿更與嬋娟鬪翠眉

湘江曲

九疑點點是離愁淚作瀟湘萬古流梧野至今迷玉輦
重華何處得珠丘遺宮髣髴當南嶽舊事蒼茫問白頭
騷客自來傷帝子况逢蕭瑟洞庭秋

寄懷毛翰林大可

苧蘿今日生才子絕似施家又一西文研定裁紅粉石
墨香應注浣紗溪多錢方朔頻辭帝無子商陵不去妻

最含六朝兼沈宋新聲妖冶使人迷
大可生蕭山嘗云西子是蕭山人見

越絕

書

太湖懷范大夫

風流誰似大夫長一載西施遂渺茫佳麗至今餘笠澤
精靈何處不夷光洞庭花枕魚鱗屋脊口雲連玉屨廊
終古紅顏感知已春來爭薦早梅芳

自中宿上韶陽道中有作

二禹離合自羅浮三峽縈迴到鬱洲螺女望夫山石老
秭鵲思婦野雲愁何心帝子偏長往有恨王孫定久留
最是南朝餘古木蕭條落葉易高秋

險絕飛崖半壓舟紛紛象馬石堂頭風教急峽三朝過
雨遣驚灘一日留山鷓催歸知有夢野花多故肯忘憂
迷津欲向煙波問漁父無人祇白鷗

一重煙雨一重愁深掩蓬牕聽濕流多羨無家惟白鷺
絕憐如故是黃牛漁燈稍辨沙邊驛戍角頻驚江上樓
垂老始知行役苦於陵衣食向人求

屈翁山詩集卷第五

卷五

四



